

Suiaassuseqatiminnik inooqateqartartut kommuunip allaffiani aappariittut nalunaarsorneqaannartarnerannut taarsiullugu oqaluffimmi katissinnaangornissaat sulissuti-geqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortamit Justus Hansenimit, Demokraatineersumit saqqummiunneqartoq)

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISUTAA

Siunnersuutip aappassaaneernejarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Andreas Uldum, Demokraatit, siulittaasuugallartoq

Juliane Henningsen, Inuit Ataqtigiit

Ruth Heilmann, Siumut

Doris Jakobsen, Siumut

Jane Petersen, Inuit Ataqtigiit, Harald Biancomut, Inuit Ataqtigiinneersumut sinniisussaq

UKA2010-mi ulloq 7. oktober 2010-mi siullermeerinninerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Aappariit suaassuseqatiminnik inooqateqartut oqaluffimmi katissinnaangornissaat taamatullu katisitsineq aappariit suaassuseqatiginngisaminnik inooqateqartut oqaluffimmi katissimasut inatsitigut sunniutaasa assinginik sunniuteqartinneqassasut siunnersuuteqartup kissaatigaa. Taamaalilluni aappariit atoqateqariaaseq apeqqutaatinnagu naligiissitaanissaat siunnersuuteqartup siunertaraa.

Inatsisartut siunnersuummik siullermeerinninnerat

Naalakkersuisut akissuteqaamminni siunnersuut tapersorneqassanngitsoq inassutigaa. Tamanna ilaatigut pissuteqarpoq susassaarfik Naalagaaffimmit tiguneqarsimanngitsoq siunnersuummut attuumassuteqarmat ilaatigullu danskit naalagaaffiata inatsisilerinikkut suliniutigisaneraa utaqqimaarniarneqarmat. Tamatumunngali peqatigitillugu tamanna Inatsisartuni a-

merlanerussutillit kissaatigissapassuk Naalakkersuisut Danmarkimi misinisteriqarfimmut su-sassaqtartumut attaveqarsinnaapput –inatsisitigut immikkut ittunik Kalaallit Nunaannut atuut-sitsilernissaq siunertaralugu.

Partiit Inuit Ataqtigiit, Siumut, Demokraatit aamma Kattusseqatigiit Partiata siunnersuut tapersorsorpaat. Naalakkersuisut akissuteqataat Atassutip tusaatissatut tiguua taamaattumillu siunnersuut tapersorsorsinnaannagu.

Naalakkersuisut ilassutitut paasissutissiissutaat

Tamatuma kingorna aappariit suaassuseqatiminnik inooqateqartut katittarnerat pillugu paasissutissanut ilassutinik imalimmik Naalakkersuisut allagaannik ataatsimiititaliaq tigusaqar-poq. Allakkat **ilanngussaq 1**-tut ilanngunneqarput. Suaassuseqatiminnik inooqateqartut aamma suaassuseqatiginngisaminnik inooqateqartut naligiissitaanissaat tunngaviatigut taper-sorsoritsik Naalakkersuisut allakkaminni oqaatigaat suaassuseqatiminnillu inooqateqartut oqa-luffimmi katittalersinnaanerat siunnersuummi tunngaaviusumik eqqarsaatip piviusunngortin-nissaa periarfissaqartoq taallugu.

Periarfissat marluk Naalakkersuisut allakkaminni taavaat:

1. *Katittarneq avittarnerlu pillugit inatsimmik atuuttuulersitsinermi maanna atuuttumi Kalaallit Nunaannuinnaq atuuttussamik immikkut aalajangersagaliorneq.*
2. *Katittarneq avittarnerlu pillugit danskit Kalaallit Nunaannut atuuttussamik immikkut inatsisiliornerat imaluunniit suaassuseqatigiit katittarnerat kisiat pillugu immikkut inatsisiliornerat.*

Immikkoortoq 1 pillugu Naalakkersuisut allapput:

”Naalakkersuisut isumaqarput, siunnersuutip taamaattup danskit naalakkersuisuinit akuersaarneqarnissaa ilimanarpallaanngitsaq”.

Immikkoortoq 2 pillugu Naalakkersuisut allapput:

“ Ilimanaateqarneruvoq danskit naalagaaffiata katinnerup inatsisitigut sunniutai pillugit Kalaallit Nunaannut inatsisiliornissaq imaluunniit suaassuseqatigiit katis-sinnaanerat kisiat pillugu inatsisiliornissaq atuuttuulersitsinermi aalajangersaga-liornissamiit akuersaarnartinnerussagaat. Taama isumaqarnermut tunngaviuvoq matumani pineqassamat inatsit nutaaq, qallunaat inatsisaanni aalajangersakkap Kalaallit Nunaanniinnaq atuuttussap atuuttuulersinnissaa pineqarani.”

Aamma Naalakkersuisut paasissutissiissutigaat:

"... Kalaallit Nunaanni Ilagiit inatsisitigut periarfissaq atorusussagaluarpassuluunniit, palasit ataasiakkaat nalunngissutsimikkut immikkut illersugaapput. Tamanna malillugu palasit ataasiakkaat toqqaasinnaatitaapput, iliuutsit namminneq upperisakkut isumaqatiginngisatik pinngitsoorsinnaallugit. Taamaalilluni palasi suaassuseqatigiinnik katititsinissaminut naagaarsinnaavoq.

Taamaammat danskit naalagaaffiata pineqartumut tunngatillugu inatsisiliorneq allanngortikkumassagaluarpaguluunniit, taamaalillutillu suaassuseqatigiit oqaluffimmi katissinnaalernissaannut tunngavissiuussinissamik kissaateqarneq akuersaarlugu, mianerisassaqartuassaaq ilanngullugit eqqarsaatigisariaqartunik.

Qulaani taaneqartutut teknikkikkut periarfissaqarpoq suaassuseqatigiit katisinnaalernissaanut inatsisiliorinissamut, kisianni periarfissat arlaalluunniit Inatsisartut toqqassagaluarpassuk, pisinnaalersitsineq aatsaat atorineqarsinnaalissaaq Kalaallit Nunaanni Ilagiit tamatuma atornissaa toqqarpasuk."

Taamaalillutik Naalakkersuisut suaassuseqatiminnik inooqateqartut suaassuseqatiginngisaminillu inooqateqartut naligiissutaanissaannut iluarinninnerat nuannaarutissaasoq pissusissamisoortorlu ataatsimiititaliaq isumaqarpoq.

Ataatsimiititaliap siunnersuummik suliarinninnera

Aappariit suaassuseqatiminnik inooqateqartut kommuunip allaffiani aappariittut nalunaarsorneqaannartarnerannut taarsiullugu oqaluffimmi katissinnaanngornissaat pillugu siunnersuut ataatsimiititaliap tapersorsorpaa. Taamatuttaaq aappariit suaassuseqatiminnik inooqateqartut katissinnaalernissaannut danskit naalagaaffiata isummernissaa Kalaallit Nunaata utaqqissapagu tamanna naleqqutuunngitsutut ataatsimiititaliap isumaqarfigaa.

Aappariit suaassuseqatiminnik inooqateqartut oqaluffimmi katissinnaalernissaat inatsisiliorinikkut qulakkeerneqarnissaa pillugu Naalakkersuisut periarfissaliussaataq marluk soqutigartilugit ataatsimiititaliap nalilerpai. Periarfissatut taaneqartut tunngavigalugit allannguutissatut siunnersuummik Ataatsimiititaliaq siunnersuuteqalersaarpoq aappariit suaassuseqatiminnik inooqateqartut Kalaallit Nunaanni oqaluffimmi katissinnaalernissaat pillugu danskit naalagaaffiannut saaffiginninnissamik Naalakkersuisut peqqunerisigut.

Aamma inuit marluk suaassuseqatigiit katissimasut kalaallisut qanoq taaneqartarnissaat eqqarsaatigalugu inaarutaasumik oqaasertalernissaa pillugu Naalakkersuisut Oqaasileriffimmut saaffiginnissasut ataatsimiititaliap kissaatigaa.

Ataatsimiititaliap inassuteqaataa

Siuliani taaneqartut Inatsisartullu siunnersuummik siullermeerinninneranni nassuiaasiunneqartut tunngavigalugit **allannguutissatut siunnersuut** manna ataatsimiititaliap isumaqatigiitup saqqummiutissavaa:

”Suaaassuseqatigiinnik oqaluffimmi katititsisarnissamut inatsisitigut tunngavissiisoqarsinnaangorlugu katittarneq avittarnerlu pillugit Folketingimi Kalaallit Nunaannut inatsisissatut siunnersuuteqartoqarnissaa siunertaralugu Naalakkersuisut ingerlaannarlutik danskit naalakkersuisuinut saaffinneqqullugit peqquneqarnissaat pillugu Inatsisartut aalajangiiffisassaattut siunnersuut”

Allannguutissatut siunnersuut akuersissutigineqassasoq ataatsimiititaliap isumaqatigiitup inassutigaa.


Taama oqaseqarluni isumaliutississummilu allassimasutut paasinnilluni ataatsimiititaliap siunnersuut aappassaaniigassanngortippaa.




Andreas Uldum




Jane Petersen



Juliane Henningsen



Ruth Heilmann



Doris Jakobsen